



## **DISKURSU**

**SUA EXELÉNSIA MINISTRU**

**PREZIDÉNSIA KONSELLU MINISTRUS,**

**AGIO PEREIRA**

**IHA OKAZAUN SERIMÓNIA INAUGURASAUN BA EDIFÍSIU SENTRU ARKIVU  
CENTRO NACIONAL CHEGA! IP**

**"Políticas Arkivu nian hanesan Fonte ba Memória no Esperansa"**

Centro Nacional Chega!  
Loron 9 fulan-juñu tinan 2026



Palácio do Governo  
Avenida Marginal  
Dili, Timor-Leste

Sua Exelénsia Señor Primeiru-Ministru,

Exelénsias Señores Membrus Parlamentu Nasionál,

Exelénsias Señores Membrus Governu,

Distintus representantes korpu diplomátiku no parseiru  
dezevolvimentu sira,

Reprezentantes instituisaun Estadu nian,

Membrus sosiedade sivíl,

Señór Diretór Ezekutivu Centro Nacional Chega!,

Señora no Señor sira,

Ho laran-haksolok tebes, mak ohin ha'u partisipa iha inaugurasaun ofisiál ba Sentru Arkivu foun Centro Nacional Chega! IP nian, infraestruturá ida ne'ebé reforsa kapasidade nasional hodi prezerva, proteje no transmite memória istórica Timor-Leste nian ba jersaun agora no futuru.

Ita mós selebra Loron Internasionál Arkivu nian, okaziaun ida ne'ebé fó hanoin mai ita katak arkivu la'ós de'it sai fatin hodi rai dokumentu sira.

Iha nasaun ida hanesan Timor-Leste, ne'ebé ninia istória marka ho konflitu, rezisténsia no luta ba autodeterminasaun durante dékada barak, prezervasaun memória hetan signifikadu ida ne'ebé kle'an tebes.

Tanba ne'e, arkivu públiku iha papél fundamentál hodi harii dame no rekonsiliaasaun.

Iha kontestu ida-ne'e, importante atu hanoin-hetan papél úniku ne'ebé hala'o hosi Centro Nacional Chega!

Kria Centro Nacional Chega! atu halo tuir rekomendasaun husi Komisaun Akollimentu, Lia-loos no Rekonsiliaasaun no mós Komisaun Lia-loos no Amizade, Centro Chega! hala'o ona papél importante ida hodi prezerva memória nasional, promove direitus umanus, eduka ba dame no hametin rekonsiliaasaun.

Instituisaun nia lema rasik – “Husi Memória ba Esperansa” – hatudu ho loloos misaun ida-ne'e.

Memória la'ós de'it haree ba pasadu. Memória mós instrumentu ida atu harii futuru.

Simbóliku tebes katak inaugura sentru arkivu foun ida-ne'e iha loos iha-ne'e, iha eis-Komarka Balide.

Fatin ida ne'ebé marka kle'an ho istória Timór-Leste nian, iha-ne'ebé, durante período okupasaun, instalasaun sira-ne'e asosia ho represaun ne'ebé halo hasoru timoroan barak ne'ebé luta ba liberdade, autodeterminasaun, no dignidade sira-nia povu nian.

Ohin, fatin ida-ne'e hetan signifikadu ida ne'ebé diferente.

Ida-ne'e maka transformasaun ida ne'ebé simbóliku no maka'as tebes.

Inaugurasaun ida-ne'e mós hala'o iha momentu ida ne'ebé importante tebes iha ita-nia istória.

Semana balu liubá, iha loron 20 fulan-maiu, ita celebra tinan 24 Restaurasaun Independénsia nian.

Númeru ida ne'ebé koincide ho tinan 24 período okupasaun indonézia nian, hosi tinan 1975 to'o tinan 1999.

Koinsidénsia istórica ida-ne'e konvida ita atu halo reflesaun.

Durante tinan 24 independénsia ne'e, ita harii ona instituisaun demokrátika sira, konsolida pás, hametin ita-nia prezensa internasionál no kontinua dezenvolve Estadu.

Maibé perkursu ida-ne'e só bele komprende ho kompletu se ita prezerva memória tinan 24 antes Restaurasaun Independénsia no sakrifísiu sira ne'ebé halo bele hetan liberdade ne'ebé ita goza ohin loron.

Arkivu maka bele halo ligasaun entre pasadu no futuru. Arkivu maka bele halo ita komprende ita mai hosi ne'ebé atu nune'e bele deside di'ak liután ita hakarak ba ne'ebé.

Sentru Arkivu foun ne'e mós nu'udar pasu importante ida iha modernizasaun jestaun dokumentu iha Timor-Leste.

Tanba razaun ida-ne'e, ha'u simu ho laran-haksolok semináriu ne'ebé sei akontese hafoin serimónia ida-ne'e, ne'ebé ko'alia kona-ba polítikas arkivu no siberseguransa.

Governu Konstitusionál IX rekoñese tebes realidade ida-ne'e.

Tanba ne'e, Governu serbisu daudaun hodi prepara instrumentu lejizlativu lubuk ida ne'ebé ho objetivu atu reforsa enkuadramentu nasional iha área siberseguransa, protesaun sistema informasaun no reziliénsia dijital.

Prezervasaun ba memória istória no protesaun ba informasaun dijital agora nu'udar dimensaun rua ne'ebé la bele haketak.

Garante seguransa ba arkivu dijital signifika mós asegura katak memória nasional hetan nafatin protesaun no jerasaun sira iha futuru bele hetan asesu.

Molok remata, ha'u hakarak hato'o agradesimentu Governu nian ba UNESCO, KOICA, no parseiru sira hotu ne'ebé kontribui ona ba realizasaun projetu ida-ne'e, no mós ba Diretór Ezekutivu no ekipa hosi Centro Nacional Chega! ba sira-nia serbisu kontínuu hodi prezerva memória istória ita-nia nasaun nian.

Señora no Señor sira,

Sentru Arkivu foun ida-ne'e la'ós de'it hanesan edifísiu ida.

Ida-ne'e maka kompromisu ida ba lia-loos.

Ida-ne'e maka kompromisu ida ba memória.

Ida-ne'e maka kompromisu ida ba jersaun sira iha futuru.

Ida-ne'e maka kompromisu ida ba esperansa.

Ita halo ida-ne'e atu fó onra ba memória hosi sira ne'ebé luta ba ita-nia liberdade no atu garante katak sira-nia legadu kontinua inspira jersaun sira ne'ebé sei kontinua harii Timor-Leste.

Obrigadu barak.